

**Rayuan Kerajaan Kelantan Ditolak, Kes Kekal Didengar Secara Isu Perundangan Bernama  
26 April , 2012**

PUTRAJAYA, 26 April (Bernama) -- Mahkamah Rayuan hari ini menolak permohonan kerajaan Kelantan bagi mengetepikan keputusan Mahkamah Tinggi dalam kes saman pelanggaran kontrak terhadap Petroliam Nasional Berhad (Petronas) yang perlu didengar dan diselesaikan mengikut isu perundangan.

Mahkamah itu turut menolak permohonan kerajaan negeri untuk dibekalkan dokumen-dokumen kes berikutan keputusan Hakim Datin Zabariah Mohd Yusof memerintahkan pihak-pihak berkenaan terlebih dahulu meneruskan mengikut Perintah 14A Peraturan Mahkamah Tinggi 1980 tanpa perlu melalui perbicaraan penuh.

Dengan keputusan Mahkamah Rayuan ini, perkara itu akan didengar di hadapan Zabariah tanpa memanggil mana-mana saksi dengan pengurusan kes ditetapkan pada 30 April.

Keputusan sebulat suara itu dicapai oleh panel tiga hakim, diketuai Hakim Datuk Ramly Ali, yang mendapati Hakim Mahkamah Tinggi tidak terkhilaf dalam keputusannya yang membenarkan Petronas dan Kerajaan Persekutuan memutuskan saman itu ditentukan secara isu perundangan.

Dua lagi hakim ialah Datuk Lim Yee Lan dan Datuk Clement Allan Skinner. Hakim Ramly berkata tiada alasan untuk mahkamah itu campurtangan.

Namun, beliau membenarkan permohonan peguam Kerajaan Kelantan Tommy Thomas untuk menangguhkan prosiding ditetapkan pada 30 April di Mahkamah Tinggi Kuala Lumpur sementara menunggu rayuan keputusan hari ini di Mahkamah Persekutuan.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=662145>